

PANDEMIK COVID-19: WAKAF SEBAGAI ALTERNATIF PENYELESAIAN KEPADA MALAYSIA

Intan Fatimah Anwarⁱ, Nuradli Ridzwan Shah Mohd Daliⁱⁱⁱ, Syadiyah Abdul Shukorⁱⁱⁱ & Muhamad Azrin Nazri^{iv}

ⁱ (Corresponding author). Pensyarah, Fakulti Ekonomi dan Muamalat, Universiti Sains Islam Malaysia, intan.anwar@usim.edu.my

ⁱⁱ Profesor Madya, Fakulti Ekonomi dan Muamalat, Universiti Sains Islam Malaysia, nuradli@usim.edu.my

ⁱⁱⁱ Pensyarah Kanan, Fakulti Ekonomi dan Muamalat, Universiti Sains Islam Malaysia, syadiyahas@usim.edu.my

^{iv} Pensyarah Kanan, Fakulti Ekonomi dan Muamalat, Universiti Sains Islam Malaysia, muhdazrin@usim.edu.my

Abstract

Pandemik COVID-19 telah menimbulkan panik di seluruh dunia dengan angka kes jangkitan dan kematian yang kian bertambah. Penularan pada awalnya dikatakan bersifat sementara telah berlarutan yang mana sehingga penghujung Ogos 2020, Pertubuhan Kesihatan Dunia (WHO) merekodkan sebanyak 24,257,989 kes disahkan dengan 827,246 kematian yang berlaku di seluruh dunia. Kesan serta merta ke atas tahap kesihatan masyarakat adalah yang paling membimbangkan dan sekaligus memberi kesan kepada ekonomi dan sosial sesebuah negara. Artikel ini mengupas situasi COVID-19 yang berlaku dari awal penularannya di dunia dan Malaysia dengan menggunakan data dan sumber berbentuk sekunder. Dapatan artikel ini mencadangkan wakaf sebagai alternatif penyelesaian kepada isu COVID-19 di Malaysia bersandarkan kepada pelaksanaan dan kejayaan wakaf terdahulu dan terkini.

Kata kunci: *Pandemik COVID-19, Coronavirus, wakaf, alternatif penyelesaian, Malaysia.*

PENDAHULUAN

Ekonomi global pada tahun 2020 diunjurkan sebagai sederhana tetapi stabil dengan menyasarkan strategi-strategi pemulihan dan rangsangan ekonomi dari negara-negara serantau dalam memperbaiki tahap ekonomi negara masing-masing dan dunia. Namun tiada yang menjangkakan wabak COVID-19 yang mula menular di daerah Wuhan, China telah menjadi titik permulaan kepada masalah ekonomi global yang meruncing dan membimbangkan. Situasi ini lebih memburuk apabila COVID-19 merebak dengan pantas ke seluruh dunia melangkah negara dan benua seawal suku pertama tahun 2020.

Dunia serantau mengalami kejutan akibat wabak COVID-19 yang pada mulanya dijangkakan hanya bersifat sementara tetapi telah berlanjutan sehingga mengakibatkan

bilangan kes jangkitan dan kematian yang tinggi di kebanyakan negara. Banyak industri-industri di setiap negara terlibat secara langsung dan tidak langsung merasa tekanan dan kesan atau implikasi wabak ini. Industri kesihatan dilihat sebagai industri yang terlibat secara langsung dan mengalami kesan serta merta antaranya berlaku permintaan yang tinggi terhadap ubat-ubatan dan bekalan kesihatan. Selain itu berlaku penguncupan dan kerugian kepada pendapatan industri seperti perhotelan, pelancongan, makanan, perkilangan, pengangkutan, pembuatan, pendidikan dan yang paling terkesan adalah industri kewangan dan perbankan akibat daripada langkah-langkah drastik yang terpaksa diambil oleh sesebuah kerajaan dalam membendung penularan wabak Coronavirus.

Industri kewangan dan perbankan adalah industri yang berkait rapat dengan ekonomi disebabkan tindakan yang diambil oleh kerajaan adalah untuk memastikan rakyat sebuah negara mampu menyara hidup dengan tidak mengabaikan tahap kesihatan mereka. Maka, peranan ekonomi dalam membentuk keharmonian rakyat amatlah besar dan signifikan supaya tiada tekanan yang mendesak dari sudut kewangan dan bukan kewangan yang boleh menyebabkan kemudaratannya kepada rakyat dan negara keseluruhannya. Kerajaan adalah antara penggerak utama dalam menentukan strategi dan mekanisme untuk meminimumkan risiko dan kesan COVID-19 ke atas masyarakat.

Namun begitu, dari perspektif Islam wakaf dilihat sangat relevan dan sesuai diketengahkan sebagai mekanisme alternatif dalam membantu permasalahan COVID-19 ini. Sejarah zaman Baginda Rasulullah SAW lagi telah membuktikan wakaf memakmurkan masyarakat dan meningkatkan ekonomi bukan sahaja penduduk Islam bahkan bukan Islam pada ketika itu. Potensi wakaf berkembang pesat kemudiannya di zaman para sahabat Baginda dan empayar-empayar Islam yang lain. Empayar Uthmaniyyah di Turki menjadi contoh terbaik yang berjaya dan banyak mengaplikasi wakaf di dalam pentadbiran negaranya sehingga ke hari ini.

Penularan COVID-19

COVID-19 diumumkan oleh Organisasi Kesihatan Sedunia (WHO) sebagai satu wabak penyakit Coronavirus dengan nama lain iaitu SARS-CoV-2 atau sebelumnya dikenali sebagai 2019-nCoV (World Health Organization (WHO), 2020a). Ianya adalah sejenis wabak sindrom pernafasan akut yang kritikal dan pertama kali muncul di sebuah pasar makanan laut di Selatan Hunan bandar Wuhan, Wilayah Hubei, China pada 12 Disember 2019 (Elengoe, 2020; Yan-Rong Guo et al., 2020). Organisasi Kesihatan Sedunia (WHO) dengan rasminya telah mengisytiharkan penularan ini sebagai wabak epidemik yang perlu diberi perhatian antarabangsa sebagai kecemasan kesihatan awam pada 30 Januari 2020 (Yan-Rong Guo et al., 2020). Ini kerana jika melihat kepada data WHO pada awal suku tahun iaitu sehingga 1 Mac 2020, terdapat sejumlah 87,137 kes yang disahkan di

seluruh dunia dengan sebanyak 79,968 kes berlaku di China manakala baki sebanyak 7,169 kes telah merebak ke luar negara China serta telah mencatatkan kematian sebanyak 2,977 kes dengan 3.4 peratus (Yan-Rong Guo et al., 2020).

Tanggal 11 Mac 2020, Coronavirus ini bukan lagi menjadi sebuah epidemik iaitu yang hanya melibatkan jumlah besar pada populasi sebuah masyarakat, sebaliknya telah bertukar ke pandemik yang telah merebak luas ke negara-negara dan benua-benua lain di dunia (Liu, Lee, & Lee, 2020). Sehingga 28 Ogos 2020 iaitu setelah hampir sembilan bulan wabak ini menular, sebanyak 24,257,989 kes telah disahkan dengan 827,246 kematian telah direkodkan oleh WHO (World Health Organization (WHO), 2020b).

PERMASALAHAN KAJIAN

COVID-19 di Malaysia

Berdasarkan kajian terdahulu oleh Elengoe (2012), kes pertama COVID-19 di Malaysia telah dikesan pada 25 Januari 2020 yang melibatkan tiga warganegara China di mana orang yang disiasat atau *person under investigation (PUI)* mempunyai sejarah hubungan rapat dengan orang yang dijangkiti di Singapura. Manakala, rakyat Malaysia pertama yang disahkan dijangkiti COVID-19 adalah pada 4 Februari 2020 iaitu merupakan seorang lelaki berumur 41 tahun yang mempunyai simptom demam dan batuk semenjak pulang dari Singapura.

Kerajaan Malaysia dengan kerjasama Kementerian Kesihatan Malaysia (KKM) telah mengambil pendekatan yang baik dan langkah pantas bagi membendung penularan wabak dengan memperkenalkan tiga strategi penting iaitu pencegahan, pembendungan dan kawalan (Rohman, 2020). Berdasarkan maklumat dari laman infografik KKM pada peringkat awal penularan iaitu sekitar suku tahun dari Januari ke Mac 2020, Malaysia telah mencatatkan sebanyak 2,858 kes jangkitan dengan Selangor sebagai negeri yang mempunyai kes tertinggi iaitu sebanyak 718 kes diikuti Kuala Lumpur sebanyak 446 kes dan seterusnya Johor dan Sabah yang masing-masing mencatat 361 dan 208 kes. Lain-lain negeri adalah di bawah 200 kes jangkitan tanpa tiada negeri atau wilayah yang tidak mencatatkan kes COVID-19. Sehingga pertengahan Ogos tahun ini, Malaysia telah mencatatkan sebanyak 9,306 kes jangkitan.

Walaupun bagaimanapun, sehingga penghujung Ogos, Malaysia masih berada jauh di bawah berbanding negara-negara lain di dunia dalam bilangan kes COVID-19. Malahan data terkini, berbanding negara-negara ASEAN, Malaysia berada di belakang Singapura yang jumlah populasinya jauh lebih kecil tetapi mempunyai kes enam kali ganda daripada Malaysia iaitu sebanyak 56,666 kes (KKM, 2020). Berdasarkan data KKM, kadar kematian yang rendah iaitu 1.34 peratus serta kadar pesakit pulih yang tinggi iaitu 97.03

peratus menunjukkan Malaysia mampu mengekang penularan COVID-19 dari menjadi lebih parah di dalam negara sendiri.

Implikasi COVID-19 kepada Malaysia

Sehingga saat ini seluruh dunia bukan sahaja masih berjuang menangani COVID-19 tetapi secara serius merangka, mengerakkan dan mengawal kesan-kesan langsung dan tidak langsung yang menghimpit negara masing-masing. Di Malaysia bagi mengekang Coronavirus, pelaksanaan Perintah Kawalan Pergerakan (PKP) diumumkan oleh Perdana Menteri, Tan Sri Muhyiddin Yassin dan berkuat kuasa pada 18 Mac 2020 selama dua minggu sehingga akhir bulan Mac dan kemudiannya disambung ke fasa-fasa seterusnya sehingga kepada Perintah Kawalan Pergerakan Diperketatkan (PKPD), Perintah Kawalan Pergerakan Bersyarat (PKPB) dan terbaru adalah Perintah Kawalan Pergerakan Pemulihan (PKPP) sehingga 31 Disember 2020.

Jika dilihat kepada garis waktu berlangsungnya pandemik ini, sudah pasti ianya menjejaskan banyak perkara terutamanya kepada masyarakat yang perlu menerima dan mengadaptasi norma-norma baru dalam kehidupan mereka. Dalam isu ekonomi, Pelan Pemulihan Jangka Pendek dibentuk kerajaan di bawah Kementerian Kewangan untuk mengadakan tindakan pemulihan dan mengawal kesan COVID-19 dengan sokongan daripada sektor-sektor yang terlibat seperti sektor pelancongan, usahawan sosial, industri kreatif, persatuan peniaga, teknologi dan e-dagang, pendidikan, perumahan, pembuatan, sumber manusia, perubatan swasta, pertanian dan perladangan serta tidak ketinggalan bantuan daripada perkhidmatan profesional dan pertubuhan bukan kerajaan (NGO) (Zainuddin, 2020).

Sektor pelancongan, perhotelan dan penerbangan umpamanya adalah yang paling terjejas teruk akibat daripada sekatan masuk pelancong dari luar negara disebabkan perintah kawalan pergerakan yang telah dilaksanakan di pintu masuk setiap negara termasuk Malaysia. Lebih terkesan lagi terdapat pengusaha-pengusaha dalam sektor-sektor ini yang mengambil langkah pengurangan gaji, pemberian cuti dan pemberhentian ke atas pekerja serta penutupan operasi. Pemberhentian pekerjaan dan penutupan perniagaan ini adalah kesan terburuk yang turut berlaku di sektor-sektor lain seperti sektor perusahaan kecil dan sederhana (PKS), makanan, perkhidmatan dan swasta. Seperti yang dilaporkan oleh Zainuddin (2020) dalam laporannya berdasarkan kajian oleh Nielson, dalam tempoh PKP lebih 40 peratus responden dari golongan pekerja mengalami pengurangan pendapatan. Menurut beliau juga, laporan Jabatan Perangkaan menyatakan cabaran utama yang dihadapi golongan peniaga adalah membayar gaji pekerja iaitu sebanyak 77 peratus, diikuti dengan kekurangan pelanggan sebanyak 66 peratus, kemudian masalah membayar sewa premis sebanyak 61 peratus

dan terakhir adalah masalah aliran tunai sebanyak 36 peratus. Dari sudut ekonomi, kerajaan melalui Kementerian Kewangan pantas melaksanakan beberapa dasar antaranya adalah Pelaksanaan Pakej Rangsangan Ekonomi Prihatin Rakyat (PRIHATIN) dan Pelan Jana Ekonomi Negara (PENJANA) yang kini sudah memasuki pelaksanaan ke-19 sejak pandemik bermula. PRIHATIN misalnya dibentuk dengan tiga matlamat iaitu melindungi rakyat, memberi sokongan perniagaan dan memperkukuhkan ekonomi. Sebagai contoh, melalui matlamat pertama iaitu melindungi rakyat, seramai 4.18 juta penerima menerima manfaat sebanyak RM2.7 bilion. Manakala matlamat kedua iaitu memberi sokongan perniagaan adalah merangkumi program subsidi upah PERKESO sebanyak RM8.9 bilion yang telah disalurkan kepada 2.61 juta pekerja, dana pinjaman mudah kepada 22,322 perusahaan kecil dan sederhana (PKS) sebanyak RM10.2 bilion dan moratorium bayaran balik pinjaman institusi kewangan yang berjumlah RM78.14 bilion kepada kedua-duanya iaitu perniagaan dan rakyat. Matlamat ketiga pula, sebanyak RM1 bilion peruntukkan telah disediakan untuk program pembendungan penularan wabak COVID-19.

Maka, sejauh mana tahap kesediaan Malaysia dalam menghadapi cabaran COVID-19 ini untuk jangka masa yang diramalkan berlanjutan sehingga setahun dua lagi oleh WHO? Apakah pelan atau tindakan ekonomi atau bukan ekonomi lain yang mampu membantu rakyat Malaysia meneruskan kelangsungan hidup?

METODOLOGI

Kajian ini merupakan sebuah kertas kajian konsep. Kaedah pengumpulan data kajian adalah berdasarkan sorotan kajian dan data sedia ada atau sumber sekunder dengan menganalisa laporan-laporan dan kajian-kajian terdahulu dan terbaru yang berkaitan COVID-19 dan wakaf. Sumber maklumat dan data adalah diperolehi daripada jurnal-jurnal, berita akhbar utama secara atas talian dan laporan-laporan rasmi melalui laman-laman web rasmi seperti laman web Kementerian Kewangan Malaysia, Pertubuhan Kesihatan Dunia (WHO), Majlis Agama Islam Wilayah Persekutuan (MAWIP) dan Perbadanan Wakaf Selangor (PWS).

DAPATAN KAJIAN

Dapatan kajian ini menghuraikan tentang mekanisme wakaf dan kesesuaiannya sebagai kaedah dalam membantu permasalahan COVID-19 di Malaysia bersandarkan aplikasi-aplikasi wakaf dalam kes-kes terdahulu dan terbaru. Wakaf dihuraikan bermula

mengenai pengenalan kepada wakaf, sejarah dan penyelesaiannya dalam kesihatan sebagai rujukan kepada alternatif penyelesaian COVID-19.

Pengenalan Wakaf

Wakaf menurut istilah bahasa Arab yang diterjemahkan kepada bahasa Melayu adalah berhenti, menahan dan menghalang (MAWIP, 2020) . Menurut MAWIP lagi, dari sudut Syarak' wakaf lebih tepat lagi adalah:

“apa-apa harta yang ditahan hak pewakaf ke atas harta tersebut daripada sebarang urusan jual beli, pewarisan, hibah dan wasiat di samping mengekalkan sumber fizikalnya untuk kebajikan dengan niat untuk mendekatkan diri pewakaf kepada Allah SWT.”

Mahamood (2007) dan Monzer Kahf (1999) juga mengertikan wakaf sebagai perkara berkaitan dengan harta tertentu yang dimiliki dan dipelihara bagi tujuan yang baik dan murni demi kebajikan dan manfaat bersama dengan niat kerana Allah. Wakaf secara umumnya terbahagi kepada dua jenis wakaf iaitu wakaf khas dan wakaf am. Wakaf khas adalah harta yang diwakafkan secara khusus oleh pewakaf bagi tujuan tertentu. Sebagai contoh tanah yang diwakafkan untuk membangunkan rumah anak-anak yatim, masjid atau dijadikan kawasan perkuburan. Manakala, wakaf am adalah harta yang tidak dikhususkan kepada tujuan tertentu tetapi adalah untuk manfaat seluruh masyarakat. Selain itu, wakaf juga berbeza mengikut jenis-jenisnya iaitu wakaf *khayri* atau wakaf umum, wakaf *fi ahli* atau wakaf keluarga, wakaf *mushtarak* atau campuran, wakaf *istibdal* atau pertukaran dan wakaf tunai atau wakaf saham. Hanya wakaf tunai atau saham sahaja yang harta boleh alih atau *manqul*, sementara yang lain adalah harta tidak boleh alih atau *'aqar* (Rahman, 2009; Yaacob, 2013).

Sejarah membuktikan bahawa Baginda Rasulullah SAW telah menjadi perintis dalam mempraktikkan wakaf apabila Baginda berhijrah dengan para sahabat ke Madinah Al-Munawwarah. Pada ketika itu Baginda telah mewakafkan tanah yang dibelinya daripada dua beradik yatim piatu untuk membangunkan Masjid Quba. Pembinaan masjid lain yang dibina menggunakan sumber wakaf adalah Masjid Nabawi di Madinah. Sahabat Rasulullah iaitu Khalifah Saidina Uthman bin 'Affan, pernah mewujudkan sumber air minuman melalui sebuah telaga yang dibeli dari seorang Yahudi dan kemudian diwakafkan kepada penduduk Arab Islam dan bukan Islam.

Dilaporkan tentang harta wakaf oleh sebuah hadis daripada seorang Muslim tentang Khalifah Saidina Umar Al-Khattab telah memperolehi sebuah tanah di Khaibar. Lalu beliau mendatangi Rasulullah SAW dan meminta baginda menasihatinya mengenai hal tersebut. Maka Rasulullah SAW berkata, *“sekiranya engkau suka, engkau boleh*

mengekalkan sifatnya dan memberikan hasilnya sebagai Sadaqa". Mendengar kata-kata Baginda, maka Umar Al-Khatab pun memberikan tanah tersebut sebagai Sadaqa dan menyatakan bahawa harta itu tidak boleh dijual atau diwarisi atau diberikan sebagai hadiah. Umar Al-Khatab tekad mengabadikan harta tersebut kepada orang miskin, saudara terdekat, hamba merdeka dan musafir (Othman, 2013).

Di Turki, negara yang terkenal dengan kehebatan wakaf sejak zaman kerajaan Uthmaniah, memiliki wakaf Al-Azhar yang sangat signifikan dalam pembangunan masyarakat Islam di Mesir dengan membangunkan fasiliti-fasiliti awam seperti sekolah, universiti, hospital dan sebagainya. Ini terbukti jelas dengan kejayaan Universiti Al-Azhar yang sepenuhnya berteraskan sumber wakaf dan menjadi contoh terbaik dan paling berjaya kerana sudah membiayai ramai para pelajarnya dari merata pelusuk dunia dalam pelbagai bidang (Perbadanan Wakaf Selangor (PWS), 2020).

Di Malaysia, terdapat banyak institusi-institusi yang menguruskan pentadbiran wakaf iaitu Yayasan Wakaf Malaysia (YWM), Jabatan Wakaf, Zakat dan Haji (JAWHAR) dan Majlis Agama Islam Negeri (MAIN). Sistem wakaf di Malaysia dilaksanakan melalui bidang kuasa MAIN yang dibantu YWM yang mana kedua-duanya dilantik sebagai pentadbir dan pemegang amanah kepada wakaf tunai dan semua bentuk harta wakaf yang lain (Ibrahim & Ibrahim, n.d.; Ismail, Muda, & Hanafiah, 2014).

Wakaf Wadah Penyelesaian kepada Permasalahan

Berdasarkan fakta sejarah, wakaf telah membuktikan dapat menyelesaikan masalah sesebuah negara dan masyarakat sejak zaman Baginda Rasulullah SAW dan Khalifah Al-Rasyidin lagi. Dari perspektif kewangan Islam misalnya, wakaf dilihat sebagai instrumen penting bagi meningkatkan pembangunan ekonomi sesebuah negara Islam termasuk Malaysia melalui pelbagai sumber seperti perubatan, pendidikan, tempat ibadah dan projek-projek untuk faedah masyarakat (Rahman, 2009; Ramli, Mohamed, Jalil, & Hamid, 2015). Perbadanan Wakaf Selangor (PWS) menggariskan bahawa amalan wakaf berasaskan kepadua objektif iaitu pertama, wakaf dapat menyumbang kepada pembangunan masyarakat keseluruhannya dan kedua adalah ganjaran pahala yang berkekalan dan berterusan hingga ke hari akhirat kepada pewakafnya (PWS, 2020).

Çizakça (2006) menyatakan pelaburan dalam sektor kesihatan dan pendidikan berperanan besar dalam pertumbuhan modal insan dan sosial yang perlu menjadi agenda utama dalam pertumbuhan ekonomi sesebuah masyarakat terutamanya di negara-negara Islam. Wakaf berperanan membantu dan memberi peluang kepada golongan yang tidak berkemampuan untuk mendapatkan perkhidmatan kesihatan dan pendidikan. Ini disebabkan dalam Islam dituntut sebagai ibadah agar kaum Muslim mengagihkan kekayaan dengan niat yang ikhlas atas keredaan Allah SWT bagi

membantu merapatkan jurang pendapatan golongan miskin dan kaya serta sekaligus membasmi kemiskinan supaya dapat meningkatkan sistem sosial dan ekonomi negara (Çizakça, 2006; Rahman, 2009). Oleh itu, dua sektor berkenaan iaitu kesihatan dan pendidikan menjadi wacana utama untuk dibangun secara serius supaya masyarakat yang berjaya adalah masyarakat yang sihat dan berpendidikan. Tidak dinafikan fitrah manusia selain daripada perkara-perkara asas, memerlukan tahap kesihatan yang baik dan peningkatan ilmu untuk menjamin kelangsungan hidup yang selesa dan selamat.

Wakaf Penyelesaian kepada Permasalahan Kesihatan

Tahap kesihatan penduduk sesebuah negara memberi kesan signifikan dan petunjuk kepada pembangunan ekonomi. Othman (2013) menyatakan, ketika kegemilangan institusi wakaf, wakaf penjagaan kesihatan (*Waqf Healthcare*) bukan sahaja bertindak memberi perkhidmatan percuma kepada masyarakat bahkan turut membayar kos penyelenggaraan hospital, memberi wang saku kepada pesakit dan mampu menghasilkan pakar perubatan di hospital wakaf. Selain itu, hospital wakaf telah berfungsi sebagai hospital pengajaran untuk pelajar perubatan dan menjadi tempat kajian saintifik bagi tujuan pembangunan perubatan.

Malaysia membuktikan kemampuan dengan mempunyai perkhidmatan kesihatan yang berkualiti tinggi apabila mendapat pengiktirafan dunia dengan menduduki tempat pertama kategori penjagaan kesihatan bagi Indeks Persaraan Global Tahunan 2019 (Pilus, 2020). Dalam menghadapi cabaran COVID-19 ini pula, Malaysia diiktiraf sebagai antara lima negara terbaik dan menjadi negara contoh di dunia dalam menanganinya serta turut mendapat pujian daripada WHO. Ianya berdasarkan tindakan-tindakan pantas dalam membuat keputusan oleh kerajaan untuk mengadakan kawalan pergerakan, mengarahkan penutupan sekolah dan perniagaan, membuat ujian saringan kepada pesakit yang disyaki, membuat kaji selidik jangkitan kes, kawalan ketat kepada beberapa daerah yang dijangkiti teruk dan menyediakan informasi-informasi statistik terkini yang tepat kepada masyarakat. KKM telah memainkan peranan yang penting dan baik bukan sahaja dalam menguruskan hal berkaitan COVID-19 tetapi juga dalam menawarkan perkhidmatan, kemudahan dan bantuan kesihatan kepada pesakit.

Seiring dengan kejayaan pencapaian perkhidmatan kesihatan di Malaysia, wakaf dilihat dapat membantu mengekalkan lagi mutu kesihatan negara. Ini didasarkan kepada penyusutan ekonomi yang berlaku kesan daripada masalah COVID-19 yang masih berlanjutan. Mahamood (2020) dalam penulisannya menyatakan secara menyeluruh bagaimana wakaf mampu diperkasakan sepenuhnya dalam memenuhi tuntutan keperluan ekonomi. Katanya, sebagai contoh Malaysian Medical Relief Society or MERCY Malaysia telah mewujudkan dana wakaf COVID-19 untuk menyalurkan

mesin bantuan pernafasan ke unit rawatan rapi (ICU) di hospital-hospital kerajaan yang terpilih. Mahamood (2020) turut mencadangkan penggunaan wakaf am dan wakaf khas bagi tujuan COVID-19. Seperti yang telah diterangkan sebelum ini oleh penulis, wakaf am adalah berbentuk harta yang tidak dikhususkan kepada tujuan tertentu. Maka, harta atau dana am tadi boleh digunakan selagi mana tidak melanggar hukum Syarak' bagi tujuan kebajikan masyarakat dalam menghadapi kesulitan akibat COVID-19. Sebagai contoh, bantuan berupa makanan dan keperluan harian kepada golongan yang terkesan seperti gelandangan yang berhak mendapat tempat perlindungan sementara dan makanan sepanjang tempoh kawalan pergerakan. Bantuan ini juga boleh disalurkan kepada golongan B40, ibu tunggal, mereka yang hilang pekerjaan dan pelajar-pelajar di institusi pengajian tinggi yang terkandas pulang.

Manakala wakaf khas pula dana yang dikutip secara khusus bagi tujuan tertentu yang bersifat kekal. Dana yang dikutip ini boleh dibuat pembelian untuk kelengkapan dan peralatan hospital seperti yang dilakukan oleh MERCY Malaysia dalam menyediakan mesin bantuan pernafasan atau keperluan lain seperti kelengkapan pakaian keselamatan petugas barisan hadapan, peralatan ujian saringan atau '*swab test*', khidmat pengangkutan ambulans, katil dan pelbagai bentuk keperluan yang dikhususkan.

Di Malaysia hari ini seperti yang dinyatakan Mahamood (2020) sudah terdapat hospital dan klinik yang ditubuhkan berasaskan wakaf seperti hospital dan klinik Waqaf An-Nur di Johor yang dibangunkan oleh Johor Corporation menerusi Masjid An-Nur Kotaraya dengan kerjasama Majlis Agama Islam Johor (MAIJ). Selain itu, terdapat juga sebuah klinik wakaf di Kelantan dengan usaha Kumpulan Wakaf An-Nur Berhad bersama Majlis Agama Islam dan Adat Istiadat Negeri Kelantan (MAIK). Kesemua hospital dan klinik wakaf ini hanya mengenakan kos rawatan yang sangat rendah terutamanya kepada golongan yang tidak berkemampuan. Maka, dalam menghadapi COVID-19 ini, sumber wakaf boleh disalurkan kepada hospital-hospital dan klinik-klinik dalam meningkatkan produktiviti operasi.

Dana wakaf tunai pula dilihat mempunyai kecairan yang pantas dalam membeli aset-aset wakaf kekal. Sebagai contoh, selain kelengkapan dan peralatan perubatan, dana wakaf tunai ini membolehkan pembelian harta kekal wakaf seperti tanah dan bangunan yang mana ianya boleh diusahakan untuk pembinaan hospital dan klinik wakaf. Perkara ini boleh diperhalusi lebih dalam lagi oleh Majlis Agama Islam Negeri (MAIN). Amin (2020) dalam laporan artikelnya menulis, Institut Latihan Islam Malaysia (ILIM) dan Yayasan Warisan Ummah Ikhlas (WUIF) dengan rakan kerjasama mereka seperti Jakim, TV AlHijrah, Sinar Harian, Ideaktiv, WUIF dan Rumah Ngaji di seluruh negara telah mewujudkan dana Al-Quran iaitu Program Wakaf Quran Mu'jam. Ianya bertujuan mengumpul sumbangan membeli Al-Quran yang bernilai RM45 senaskhah

untuk diserahkan kepada para pesakit dan petugas hadapan hospital di hospital-hospital, pusat kesihatan dan pusat kuarantin sebagai sokongan emosi dan rohani.

KESIMPULAN

COVID-19 jelas menjejaskan pertumbuhan sosial dan merencatkan ekonomi selain sangat terkesan kepada tahap kesihatan masyarakat. Bahkan Coronavirus ini telah menjadikan pandemik yang saban hari berlaku peningkatan angka kes dan kematian. Setiap negara di dunia berusaha meningkatkan kualiti kesihatan seiring dengan peningkatan kes sembuh dan penurunan kes jangkitan. Perbelanjaan bagi setiap pelan perancangan yang dibuat kerajaan mahupun pertubuhan-pertubuhan bukan kerajaan (NGOs) dalam mengekang wabak dan membantu masyarakat sudah pasti memerlukan peruntukan yang besar. Masyarakat tidak boleh terus mengharapkan bantuan daripada institusi-institusi perbankan yang mempunyai limitasi kredit dan faedah yang tinggi. Peruntukan dan bantuan kerajaan juga tidak bersifat kekal dan bergantung kepada nilai simpanan negara.

Oleh yang demikian, wakaf amat bertepatan menjadi wadah alternatif untuk diketengahkan terutama dalam menghadapi pandemik COVID-19 ini. Sejarah beratus tahun lampau telah membuktikan ia mampu merapatkan jurang kemiskinan, menjadi pemangkin ekonomi Islam dan melestari serta memakmurkan masyarakat dan negara tanpa mengira bangsa dan agama kerana faedahnya memanfaatkan seluruh ummah. Wakaf mempunyai potensi yang besar untuk diguna pakai atau dilaksanakan di Malaysia kerana sebagai sebuah negara yang bermajoritikan umat Islam, kita seharusnya mendidik generasi baru dan bukan Islam tentang matlamat dan kebaikan wakaf. Penyelidik, golongan akademik dan agama serta kerajaan perlu duduk semeja untuk menjadikan wakaf sebagai agenda utama negara dalam memperkukuhkan struktur kewangan dan ekonomi Malaysia.

RUJUKAN

Buku

- Çizakça, M. 2006. Economic Dimensions of Foundations in the Ottoman Era. *Philanthropy in Turkey: Citizens, Foundations and the Pursuit of Social Justice*. Third Sector Foundation of Turki.
- Monzer Kahf. 1999. *Fiqhi Issues in the Revival of Awqaf*. In Harvard Forum on Islamic Finance and Economics.

Othman, R. 2013. *Institusi Wakaf Sejarah dan Amalan Masa Kini*. Dewan Bahasa Dan Pustaka. Kuala Lumpur.

Jurnal

Elengoe, A. 2020. *COVID-19 Outbreak in Malaysia*. Osong Public Health and Research Perspectives. 11(3) 93–100. Selangor: Lincoln University College.

Ibrahim, D., & Ibrahim, H. 2014. *Revitalization of Islamic Trust Institutions through Corporate Waqf*, 1–11. Kedah: Universiti Teknologi MARA

Ismail, C. Z., Muda, S., & Hanafiah, N. J. A. 2014. *Challenges and Prospects of Cash Waqf Development in Malaysia*. Journal of Basic and Applied Scientific Research. 4(2), 340–348.

Liu, Y., Lee, J. M., & Lee, C. 2020. *The Challenges and Opportunities of a Global Health Crisis: The Management and Business Implications of COVID-19 from an Asian Perspective*. Asian Business and Management. 19(3), 277–297.

Mahamood, S. M. 2007. *Pembentukan Dana Wakaf Menurut Perspektif Syariah dan Undang-Undang Serta Aplikasinya di Malaysia*. Jurnal Syariah, 15(2), 61–83.

Rahman, A. A. 2009. *Peranan Wakaf dalam Pembangunan Ekonomi Umat Islam dan Aplikasinya di Malaysia*. Shariah Journal. 17(1), 113–152.

Ramli, A. M., Mohamed, M. O., Jalil, A., & Hamid, S. A. 2015. *Cabaran Pembiayaan Sektor Pengajian Tinggi Awam di Malaysia: Potensi Instrumen Wakaf Tunai*. Sinergisme Wakaf Pendidikan Tinggi di Malaysia. 1–12.

Yaacob, H. 2013. *Waqf History and Legislation in Malaysia : A Contemporary Perspective*. Journal of Islamic and Human Advanced Research. 3(6), 387–402.

Yan-Rong Guo, Cao, Q.-D., Hong, Z.-S., Tan, Y.-Y., Chen, S.-D., Jin, H.-J., Yan, Y. 2020. *The Origin, Transmission and Clinical Therapies on Coronavirus Disease 2019 (COVID-19) Outbreak – An Update on the Status*. Military Medical Research. 7(11), 1–10.

Internet

Amin, K. M. 2020. *Wakaf Quran Mu'jam Suntik Semangat Pesakit, Petugas Barisan Hadapan*. <https://www.sinarharian.com.my/article/77627/KHAS/> (diakses pada 24 Ogos 2020).

- Kementerian Kesihatan Malaysia (KKM). 2020. Jumlah Kes COVID-19 di Setiap Negeri di Malaysia. <http://covid-19.moh.gov.my/> (diakses pada 28 Ogos 2020).
- Mahamood, S. M. 2020. Wakaf Penuhi Keperluan Ekonomi dan Perkasa Ummah. <https://www.bharian.com.my/rencana/muka10/2020/04/681394/wakaf-penuhi-keperluan-ekonomi-perkasa-ummah> (diakses pada 3 September 2020).
- MAWIP. 2020. Pengertian Wakaf. <https://www.maiwp.gov.my/i/index.php/en/2015-11-20-07-49-26/wakaf> (diakses pada 3 September 2020).
- Perbadanan Wakaf Selangor (PWS). 2020. Pengenalan Wakaf. <http://www.wakafselangor.gov.my/index.php/wakaf/pengenalan-wakaf> (diakses pada 2 September 2020).
- Pilus, F. A. M. 2020. Pengiktirafan Dunia kepada Malaysia. <https://www.hmetro.com.my/mutakhir/2019/02/420588/pengiktirafan-dunia-kepada-malaysia> (diakses pada 30 Ogos 2020).
- Rohman, M. A. P. 2020. COVID-19: Langkah Kerajaan Tangani Jangkitan Tepat, Betul - PPC. <https://www.bharian.com.my/berita/nasional/2020/04/675183/covid-19-langkah-kerajaan-tangani-jangkitan-tepat-betul-ppc> (diakses pada 30 Ogos 2020).
- World Health Organization (WHO). 2020a. Novel Coronavirus (2019-nCoV) Situation Report-1. <https://www.who.int/docs/default-source/coronaviruse/situation-reports/> (diakses pada 28 Ogos 2020).
- World Health Organization (WHO). 2020b. WHO Coronavirus Disease (COVID-19) Dashboard. <https://covid19.who.int/> (diakses pada 28 Ogos 2020).
- Zainuddin, M. Z. 2020. COVID-19: Kerajaan Analisis Kesan ke atas Sektor Terjejas. <https://www.bharian.com.my/berita/nasional/2020/06/695534/covid-19-kerajaan-analisis-kesan-ke-atas-sektor-terjejas> (diakses pada 29 Ogos 2020).